

■ OR DA LA VITA DA LUDMILLA CAHENZLI

In exempel practic per plaschair!

Jau stos m'exculpar. En mia ultima columna hai jau scrit ch'jau curriess immediat davent, sch'jau inscuntrass l'urs en Val Müstair. Qua dovri ina correctura. Pertge curren davent fiss il pli tup ch'ins po far en ina tala situaziun.

Curren davent è in reflex sanadaivel e natural. Ma quest reflex provocass tar l'urs ch'el curriess suenter ad ins. Quai n'è betg giavischabel damai che l'urs ha probabel ina megliera cundiziun.

Tenor las directivas ch'il parc naziunal dat ora sin ses feagl sgulant ston ins tschantschar dad aut cun l'urs, sch'ins vess d'inscuntrar el. Jau proponiss da dir: «Hallo mes char. Era da questas varts? Co vai? Has schon marendà?»

Per cas che l'urs pigliass tema, malgrà tut questa curtesia, ed attatgass ins, lura èsi il pli impurtant da «far tut per restar calm.» Era sche l'urs stat sin ils

pes davos, èsi strentgamaïn scumandà da fugir.

Tge fiss pia correct? Sin il feagl sgulant stà scrit: «Sa mettai en venter per terra e mettai ils mauns davos la totona.» Ins sto pia sa metter en la posiziun la pli malagidai-vla ch'ins po s'imaginar. Ma jau citesch vinvant: «L'urs vegn a fufragnar vi da Vus e constatar che Vus n'essas nagin privel per el. Spitgai, fin che l'urs è s'allontanà.»

Prima. Ma tge far, sche l'urs na s'allontanescha betg? Tge far, sch'el na senta betg sulet ch'jau sun ina turista innocent, mabain senta era ch'jau savur anc detg gustus? Tge far, sche l'urs cumenza a rusignar vi da mes venter e strair nauadora mia beglia. Beglia ha ja el gea da narr gugent. Stos jau lura giavischar ad el «in bun appetit.»

Per mes gust laschan las directivas dal parc naziunal avert memia bleras

dumondas. I fiss inditgà d'allegar a las directivas ina seria da fotos u in pitschen film documentar che musa: Co sa mettan ins per terra a moda correcta. Quant ditg ston ins restar en questa posiziun. E tge plets èn ils plets ils pli cunvegnents en il dialog cun l'urs.

Il pli prudent fissi, sche quel che ha inventà las directivas, giugass gist sez la rolla principala en il film e laschass vegnir natiers l'urs – in vair e betg forsa in'atrappa! – a fufragnar in zichelin.

Pir sch'jau vesiss in tal film avess jau fidanza en las directivas. Ma fin ch'il film n'è betg avant maun, ponderesch jau da spustar mias vacanzas da quest'atun en il parc naziunal. Mes reflex èn bler memia bain sviluppads, ed jau na ma mettiss mai per terra. Gnanca sch'jau savess che l'urs ha curt avant gist sulvì tschintg begls-vadè.



Tozzels da persunas èn dapreschent sin il Pass dal Fuorn per observar l'urs.